

三  
國  
志  
旁  
證

三國志旁證卷二十七

閩長樂梁章鉅撰

孫亮傳心自不安又勸爲亮納

殿本考證云太平御覽心自不安作心不自安勸爲亮納作勸權爲亮納爲妃

大赦改元是歲於魏嘉平四年也閏月以恪爲帝太傅

李龍官曰以孫休永安元年與孫皓元興元年例之閏月上應有建興元年四字未有嗣君改元而不書其紀年之理

按太平御覽卷一百十八引吳志云大赦改元建興元年然則宋本有建興元年四字今本譌脫耳

是月雷雨天災武昌端門改作端門又災內殿

晉書五行志云門者號令所出殿者聽政之所是時諸葛恪

執政而矜慢放肆孫峻總禁旅而險害終著武昌孫氏尊號所始天戒若曰宜除其貴要之首者恪果喪眾殄人峻授政於緜緜廢亮也或曰孫權毀徹武昌以增太初宮諸葛恪有遷都意更起門殿事非時宜故見災也

有大鳥五見於春申

按史記春申君傳烈王元年以黃歇爲相封春申君賜淮北地十二縣後歇請封於江東因城故吳墟以爲都邑 趙一清曰春申本以蘄春申息得名至徙江東城故吳墟則今蘇州也松江之黃浦一名春申浦蓋亦以歇得名

五鳳元年夏大水

晉書五行志云夏大水亮卽位四年乃立權廟又終吳世不上祖宗之號不修嚴父之禮昭穆之數有闕亮及休皓又並

廢二郊不秩羣神此簡宗廟不祭祀之罰也又是時孫峻專政陰勝陽之應乎

冬十一月星芴於斗牛

注

江表傳曰是歲交阯稗草化為稻

趙一清曰此卽王肅所指蚩尤之旗也占驗在魏正元元年又曰晉書五行志是六月占昔三苗將亡五穀變種此草妖也其後亮廢

二年陽羨離里山大石自立

潘眉曰離里當爲離墨古仙人名也離墨山一名國山張壽昌曰明統志國山本名離墨山有九峯相連亦名陞山沈敕荆溪外紀云孫亮五鳳二年離墨大石自立慎蒙名山紀勝云離墨山石無故自立並作離墨宋書五行志引京房易傳云庶士爲天子之祥也其說曰石立於山同姓平地異

姓干寶以爲孫皓承廢故之家得位其應也或曰孫休見立之祥也

使衛尉馮朝城廣陵拜將軍吳穰爲廣陵太守

孫峻傳云峻欲城廣陵朝臣知其不可城而畏之莫敢言惟滕允諫止不從而功竟不就 趙一清曰廣陵城在揚州府城東北秦置縣漢因之吳王濞都此劉昭曰濞築廣陵周四里半後江都國及廣陵國皆治焉後漢爲廣陵郡治三國魏移郡治淮陰而以故城爲邊邑後入於吳晉滅吳廣陵郡仍治淮陰宋書州郡志臨淮太守屬縣廣陵今前漢屬泗水後漢屬廣陵三國時廢太康二年又立屬廣陵然則吳時始終不得居其城邑吳穰爲太守亦虛有其號耳

畱畧爲東海太守

趙一清曰孫皓傳是南海太守且東海郡屬徐州吳時亦不得有其地此東海是南海之誤

太平元年春

注

吳歷曰正月爲權立廟稱太祖廟

何焯曰吳歷本作爲鍾立廟孫堅父名鍾見宋書志然北宋諸本皆作權字

呂還據等聞繚代峻大怒

趙一清曰聞字上落一據字蓋不伏者惟一呂據故繚遣告欽吉二人取之而據獨受其敗也

二年春二月甲寅大雨震雷乙卯雪大寒

晉書五行志云天戒若曰爲君失時賊臣將起先震雷而後雪者陰見間隙起而勝陽逆弑之禍將成也亮不悟尋見廢此與春秋魯隱同

注緣遇燥矢故成亮之慧

殿本考證云慧監本作惠今從毛本作慧然古人慧惠本通用按此注傳聞異辭而裴松之必以爲鼠矢新者亦表裡皆濕緣遇燥矢故成亮之慧則未見其必然也

詔州郡伐宮材

殿本考證云毛本宮材作官材

與太常全尙將軍劉丞謀誅緄

孫緄傳作劉承丞古字通用

孫休傳年十三從中書郎射慈郎中盛冲受學

錢大昭曰孫奮傳傳相謝慈等諫奮奮殺之慈字孝宗彭城人疑卽此射慈也射謝古字通用

有老公子休叩頭曰

殿本考證云宋本子休作干休

緄以兵千人迎於半野

太平寰宇記卷九十二云土山在昇州上元縣南三十里山無巖石有林木臺觀娛游之所卽半野也

武衛將軍恩爲御史大夫

錢大昭曰大帝時未見有御史大夫之職孫休蓋特置以寵異孫恩耳至五年又以廷尉丁密光祿勳孟宗爲左右御史大夫

丹陽太守李衡以往事之嫌自拘有司夫射鈎斬袪在君爲君遣衡還郡勿令自疑注妻習氏每諫衡

王應麟曰孫休之遣李衡有高帝之風度吳之賢君也太

平御覽卷四百四十四引襄陽耆舊記稱羊衡勸衡筮仕以

女配之則衡妻乃羊氏也習氏豈再娶邪

又於武陵龍陽汎洲上作宅

趙一清曰汎字水經注作汜是也 顧祖禹曰常德府龍陽

縣後漢爲漢壽縣地吳析置屬武陵郡汎洲在縣西五十里  
長二十里吳李衡種橘其上因名橘洲亦謂之柑洲

謙永安侯

宋書州郡志云吳興郡武康縣吳分烏程餘杭立永安縣晉  
太康元年更名 元和郡縣志云吳大帝分烏程餘不鄉置  
永安縣 一統志云永安故城在今湖州府武康縣西

三年議作浦里塘

趙一清曰通鑑胡注云據范書方技傳浦里塘在丹陽郡宛  
陵縣界

以會稽南郡爲建安郡

殿本考證云南郡當作南部

四年夏五月大雨水泉湧溢

晉書五行志云昔歲作浦里塘功費無數而田不可成士卒死叛或自賊殺百姓愁怨陰氣盛也

九月布山言白龍見

漢書地理志鬱林郡布山 顧祖禹曰布山廢縣在潯州府西五十里

是歲安吳民陳焦死埋之六日更生穿土中出

宋書州郡志宣城太守領安吳令吳立 顧祖禹曰安吳城在甯國府涇縣西藍山南吳建衡中置縣屬宣城又旌德縣西北有安吳廢縣俗謂之沙城 漢書五行志云至陰爲陽

下人爲上厥妖人死復生 宋書五行志云干寶曰此與漢宣帝同事烏程侯皓承廢故之家得位之祥也

注太子名竇竇音如湖水灣澳之灣字苕苕音如迄今之迄

竇字見廣韻二十七刪苕字見廣韻九迄注云吳王孫休長子字是也明監本毛本苕皆作酋誤今 殿本已改正 錢侗曰小名錄苕作字蘭按蘭字字書所無廣韻亦不別收蘭字恐不足爲典要也

又次子名奠奠音如兕觥之觥字羿羿音如磬首之磬奠字見廣韻十二庚羿字見廣韻一先

又次子名鉅鉅音如草莽之莽字显显音如舉物之舉

鉅字見廣韻三十七蕩注云吳王孫休子名显字亦見廣韻而不云吳王孫休子字惟司馬光類篇有显字云苕許切吳

王孫休子字 明監本詎作拒誤今 殿本已改正

又 次子名寇寇音如褒衣下寬大之褒字焚焚如有所擁持之擁

寇字見廣韻六豪焚字見集韻云委勇切吳王孫休子字

注 政以治民是以政成而民則 然欲令難犯何患無名

殿本考證云宋本治民作正民民則作民聽然作休

尤好射雉春夏之間常晨出夜還

世說規箴篇云孫休好射雉至其時則晨去夕反羣臣莫不止諫曰此爲小物何足甚孰休曰雖爲小物耿介過人朕所以好之注引條列吳事曰休在位烝烝無有遺事唯射雉可譏耳

使察戰到交阯調孔爵大豬 注 臣松之按察戰吳官號今揚都

有察戰巷

王鳴盛曰沈約宋書作蔡戰或遂疑爲人姓名但孫奮傳注引江表傳孫皓遣察戰齎毒藥賜奮死未必察戰一人至皓時又受此使宋書特傳寫誤耳潘眉曰是年所使察戰其人爲鄧荀也見晉書陶璜傳調孔雀三千頭荀在交阯爲呂興所殺汪繼熊曰吳之察戰中使也觀孫奮傳注及晉書五行志所載當是以奄宦爲之

六年五月交阯郡吏呂興等反殺太守孫諝  
晉書陶璜傳亦作諝而華陽國志作孫靖

分武陵爲天門郡

水經澧水注云永安六年武陵郡嵩梁山高峯孤竦素壁千尋望之若亭有似香爐其山洞開元朗如門高三百丈廣二

百丈門角上各生一竹倒垂下拂謂之天簪孫休以爲嘉祥分武陵置天門郡 宋書州郡志云天門太守孫休分武陵立充縣有松梁山山有石石開處數十丈其高以弩仰射不至其上名天門因此名郡

冬十月癸未建業石頭小城火燒西南百八十丈

晉書五行志云是時嬖人張布專擅國勢多行無禮而韋昭盛冲終斥不用兼遣察戰等爲內史驚擾州郡致使交阯反亂是其咎也

呂興旣殺孫譚使使如魏請太守及兵

晉書陶璜傳云晉文帝卽拜呂興爲安南將軍交阯太守

注白燕見于慈湖

按慈湖當作慈湖元和郡縣志云慈湖在宣州當塗縣北六

十五里

注 休寢疾口不能言

明監本口作日誤今 殿本已改正

孫皓傳 時年二十三

潘眉曰二十三當爲二十五考是年魏咸熙元年甲申至晉太康元年庚子凡十七年皓以是歲死于洛陽年四十二則此作二十五方合

元興元年十月封休太子竄爲豫章王次子汝南王次子梁王次子陳王

錢大昭曰班史於諸王書立書薨紀其年月日且作表以經緯之最爲盡善後之作史者所當法也吳志內諸王惟赤烏五年書立子霸爲魯王太元二年立故太子和爲南陽王子

奮爲齊王休爲瑯邪王皆書名自是而後或地而不名或名地俱缺此條太子以下三人卽靈鉅寇也並不書名外如建衡元年立子瑾爲太子及淮陽東平王鳳凰二年改封淮陽爲魯東平爲齊又封陳畱章陵等九王天紀二年立成紀宣威等十一王四年立中山代等十一王皆是也而于蜀漢則章武元年以子永爲魯王理爲梁王建興八年徙魯王永爲甘陵王梁王理爲安平王延熙元年立子瑤爲安定王十五年立子琮爲西河王十九年立子瓚爲新平王景耀二年立子諶爲北地王恂爲新興王虔爲上黨王皆備書之而西河王琮并書其卒何詳畧之不均也若云抑吳而不書則霸奮等又何以書若云闕疑而不書則承祚作志時又未至文獻無徵也

孫休葬定陵

朱彝尊曰吳志不言定陵所在順治中海甯邵灣山居民穴地得隧道行數百步道窮有碑乃孫休陵也冶銅爲門門有獸環兩狻猊夾門左右堅不可入未發而爲怨家所首亟以土掩之此地志所不載也

封后父滕牧爲高密侯注吳歷曰牧本名密避丁密改名牧丁

密避牧改名爲固

按虞翻傳注引會稽典錄亦云丁覽子固字子賤本名密避滕密改作固二人何以如此互避或滕牧之名因封高密而改丁固乃避滕而改耳

遺昔吳壽春城降將徐紹孫彧銜命齋書

晉書文帝紀徐紹作徐劭孫楚傳又作符劭孫郁郁卽彧字

注 漢晉春秋載晉文王與皓書

潘眉曰孫楚傳載文王與皓書與此不同又云劭等至吳不敢爲通然則文王令楚所作之書至吳未通其所通者又是一篇此漢晉春秋所載者是也此書不知何人所作

今遺光祿大夫紀陟注孫休時父亮爲尚書令而陟爲中書令  
每朝會詔以屏風隔其座

殿本考證云太平御覽孫休時作景皇時 按是時陟之父安得猶名亮此可疑者也 隋書經籍志有吳中書令紀隲集三卷隲疑卽陟也

又 宏璆曲阿人宏咨之孫權外甥也

宏咨見諸葛瑾傳孫權姊婿也璆若是權外甥則當是咨之子矣

夏四月蔣陵言甘露降

顧祖禹曰鍾山在應天府城東北朝陽門外一名蔣山吳大帝祖諱鍾因改曰蔣以漢末秣陵尉蔣子文逐賊有功葬此因名晉咸和三年蘇峻反於歷陽自橫江濟從南道出蔣陵胡氏曰蔣山之陵阜也

注儼弱冠知名歷顯位又蒙其榮耀

隋書經籍志張儼集一卷梁二卷又撰嘿記三卷 何校太平御覽歷上有早字蒙上有臣字耀作懼

又尙書何禎

魏書胡昭傳注引文士傳云何禎字元幹則當从木作植

弋陽可襲而取

宋書州郡志云弋陽太守本縣名屬汝南魏文帝分立

永安山賊施但等聚眾數千人注吳錄曰永安今武康縣也

宋書州郡志云吳興太守領縣有武康令吳分烏程餘杭立永安縣太康元年更名

獲謙謙自殺

潘眉曰吳歷言丁固獲謙皓醜之子母皆死與此異

建衡二年三月天火燒萬餘家死者七百人

晉書五行志云時皓制令詭暴蕩弃法度勞臣名士誅斥甚衆後宮萬餘女謁數行其中隆寵佩皇后璽綬者又多矣故有火災

諸將破扶嚴

時梁奇爲扶嚴賊帥見晉書陶璜傳

大司馬丁奉司空孟仁卒注吳錄曰仁字恭武江夏人本名宗

避皓字易焉又除爲鹽池司馬又宗入竹林哀歎而筍爲之出  
錢大昭曰古者避名不避字皓字元宗似可無避然吳錄載  
休語云今造此名字既不相配又字但一庶易棄避則孫吳  
時似有避字之說矣按太平御覽卷四百十三引孟宗別  
傳云宗事母至孝母亦能訓之以禮宗初爲雷池監奉魚于  
母母還其所寄遂絕不復食魚後宗典知糧穀乃表陳曰臣  
昔爲雷池監母三年不食魚臣若典糧穀臣母不可以三年  
不食米臣是以死守之又卷二百六十二引宗別傳云宗爲  
豫章太守民思其惠路有行歌故時人生子以孟爲名又卷  
二百二十九引宗別傳云宗爲光祿勳大會宗先少飲酒後  
有強之飲者一杯便吐傳詔司察宗吐麥飯察者以聞上乃  
歎息曰至德清純如此詔問食麥飯意答曰臣家足有米麥

飯直愚臣所安是以食之 趙一清曰鹽一本作監是也 孟宗時爲雷池監司馬又曰太平寰宇記卷一百二十五孟宗宅在舒州望江縣北一里卽哭竹生筍之處也

鳳皇元年右丞相萬彧被譴憂死

潘眉曰本傳寶鼎元年以陸抗爲左丞相常侍萬彧爲右丞相建衡元年陸凱卒鳳皇元年右丞相憂死自鳳皇二年至天紀二年不書何人爲丞相天紀三年乃書軍師張悌爲丞相攷吳禪國山碑有丞相沆時在天璽元年然則鳳皇後天紀前有名沆者爲丞相史闕不書碑又不詳其姓不可攷矣又按眞誥注許長史世譜云吳丞相許晏字孝然長史四世族祖也攷許晏仕吳官至執金吾未爲丞相嘉禾二年使遼東爲公孫淵所斬時則顧雍方爲丞相也

投其身於四望之下

按四望山名元和郡縣志四望山在上元縣西北八里

三年會稽妖言章安侯奮當爲天子

通鑑考異云孫奮傳建衡二年左夫人王氏卒民間訛言遂誅奮及五子奮若以建衡二年死不容至鳳凰三年會稽方有訛言三十國晉春秋自皓納張步女至殺奮皆在天冊元

年卽鳳凰三年也

鄱陽言歷陽山石文理成字凡二十云注江表傳曰歷陽縣有

石山又使以太牢祭歷山

輿地紀勝云歷陽山在和州西北四十里卽孫皓所祭之石  
印山按沈志晉武帝太康元年復立歷陽是吳魏時爲戰爭之地其縣已廢亦不爲吳所有且亦不得屬鄱陽 沈欽

曰歷陵今九江府德安縣注中陽字蓋陵字之誤石山石下當脫印字又以太宰祭歷山當是歷下脫陵字

又所有七穿駢羅又吳當爲九州作都渚乎

殿本考證云宋本七穿作土穿無爲字

乃遣兼司徒董朝兼太常周處至陽羨縣封禪國山

趙一清曰此卽孫亮傳之離里山大石也太平寰宇記卷九十二國山在常州宜興縣西南五十里輿地志云本名離里山山有九峯相連亦名九斗山亦名升山吳五鳳二年其山墮大石自立高九尺三寸六十三圍三寸歸命侯又封禪爲中岳改名國山改元以叶石文石今見存按禪國山碑文不載于史至歐陽集古錄始著之然續漢書祭祀志注引陽羨封禪碑云神魚吐書白鯉騰船者二靈絮神蠶彌被原野

者三梁書許懋傳亦論及國山封禪事是唐以前碑甚顯也陽羨爲今宜興國山在其西南五十里錢大昕謂史能之毗陵志云碑有大司空朝而無處名攷處傳處仕吳止東觀令無難督無兼太常之事當以碑爲正王氏昶謂少時常至碑所審其方位東面剝裂模糊今拓本前半缺蝕而雲麓漫鈔載丞相沈下有兼太常處奉迎之文則處名自見前幅後不再署者或緣事中返不得于此致疑也 王鳴盛曰吳禪國山碑見趙氏金石錄其文久漫滅趙跋約舉其文僅百許字吳搢金石存云此碑篆書甚巨今存者止二十行行九字而皆不可辨識惟趙彥衛雲麓漫抄載之頗詳約八九百字前歷言諸祥瑞後云旃蒙協洽之歲月次陳訾之舍日惟重光大淵獻受上天玉璽文曰吳眞皇帝乃以柔兆涒灘之歲欽

若上天月正革元郊天祭地紀號天璽寔彰明命于是丞相  
沈太尉璆大司徒燮大司空朝執金吾修城門校尉歆屯騎  
校尉悌尚書令忠尚書昏直晃昌國史瑩等僉以爲衆瑞畢  
至宜行禪禮遂于吳興國山之陰告祭刊石云云攷旃蒙協  
洽爲乙未陬訾之舍爲亥月據碑則得石文本是天冊元年  
十月事是年歲在乙未故于明年改元天璽柔兆涖灘是丙  
申月正革元是正月也其年八月行禪禮故明年改元天紀  
也大司空朝卽兼司徒董朝而碑無周處晉書處傳言處仕  
吳爲東觀左丞孫皓未爲無難督則是武臣而此乃云兼太  
常蓋其所兼之虛銜耳 潘眉曰碑稱大司空董朝考建衡  
三年司空孟仁卒朝當以是年爲司空鳳凰二年司徒丁固  
卒朝當以司空兼司徒故碑稱大司空而史稱兼司徒也

注 倣表立彈曲二十人 又收繫囹圄

明監本表立作表正收繫作收累並誤今 殿本已改正

又 取小妻三十餘人

殿本考證云宋本三作二

有鬼目菜生工人黃耆家依緣棗樹長丈餘又有黃菜生工人  
吳平家高四尺厚三分如枇杷形

晉書宋書五行志黃耆作黃狗引干寶說曰黃狗者吳以土  
運承漢故初有黃龍之瑞及其季年而有鬼目之妖託黃狗  
之家黃稱不改而貴賤大殊天道精微之應也 潘眉曰干  
寶以黃狗對黃龍故曰貴賤大殊又曰鬼目見爾雅郭璞云  
子如耳環赤色叢生神農本草謂之羊蹄陶隱居云今人呼  
爲秃菜蓋無丈餘者黃菜卽苦黃菜通藝錄云苦黃菜八月

生葉皆從根出不生莖亦無高至四尺者今鬼目長丈餘莖  
蕒長四尺如枇杷形此皆所以爲妖也

蕒菜作平慮草

潘眉曰揚雄甘泉賦注如淳曰并閭其葉隨時改政平則平  
政不平則傾顏師古曰如氏所說自是平慮耳今東觀以蕒  
菜爲平慮亦以生于吳平家因附會爲瑞稱耳然黃狗固土  
德之衰微而吳平亦歸命之惡讖也

龍驤將軍王濬

宋書五行志云孫皓天紀中童謠曰阿童復阿童銜刀游渡  
江不畏岸上虎但畏水中龍武帝聞之加王濬龍驤將軍及  
征吳江西衆軍無過者而王濬先定秣陵 晉書羊祜傳云  
祜聞童謠云此必水軍有功但當思應其名者耳濬小字阿

童因表畱濬監益州諸軍事

或剝人之面

杭世駿曰語林云賈充問孫皓何以好剝人之面皓曰憎其  
顏之厚

注悌不肯去覲自往牽之謂曰且夫天下存亡有大數豈卿一  
人所知

盧明楷曰且夫二字疑衍或爲巨先之譌巨先張悌字也下  
文悌曰仲思今日是我死日也明爲彼此相字

三月丙寅

又戊辰

又壬申王濬最先到

潘眉曰推是年三月戊子朔無丙寅戊辰壬申此三日皆誤  
也晉書王濬傳壬寅濬入于石頭後上書云十四日至牛渚  
去秣陵二百里又云臣以十五日至秣陵今以三月朔戊子

推之十五日恰得壬寅此傳壬申當依濬傳作壬寅爲確三  
日事在一時丙寅是丙申戊辰是戊戌

注皓殿中親近數百人叩頭謂皓曰

殿本考證云謂皓宋本作請皓 按正文本是請皓當從之

此筆誤耳

注晉陽秋曰濬收其圖籍領州四郡四十二縣三百一十三

殿本考證云太平御覽郡四十二作郡三十三 潘眉曰當  
作四十三初學記八引括地志云平吳得郡四十三晉書武  
帝紀及通典皆同 按洪亮吉補疆域志郡四十五并廬陵  
南郡都尉合浦北部尉共四十七也縣共三百三十六與此  
異或入晉後從併省而計故耳

今歸垂至意猶恐之其賜號爲歸命侯

世說排調篇云晉武帝問孫皓聞南人好作爾汝歌頗能爲否皓正飲酒因舉觴勸帝而言曰昔與汝爲鄰今與汝爲臣上汝一杯酒令汝壽萬春帝悔之

注三公鉏司馬如

錢大昕曰鉏如二字難解按神記云三公歸于司馬語意較明白

又皓意張大乃使尙廣筮并天下遇同人之頤

李光地曰乾爲天君離者南面皆尊象也艮山岳公侯之兆震于易亦占建侯此明君降爲臣位矣同人者主天下大同也頤者養也亦爲晉并吞而得寄食偷生之意筮之告皓亦顯矣

五年皓死於洛陽注時年四十二

按裴注引吳錄曰皓以四年十二月死此五年字當衍 潘  
眉曰天紀四年吳己亡皓卽死于是年安得更更有五年惟蕭  
常續漢書攷異引世紀皓以赤烏五年壬戌生太康四年癸  
卯死四十二歲如是則于登位年之二十三亦合蓋吳錄之  
所謂四年者晉太康年也 李清植曰蜀志於安樂公書曰  
公太始七年薨于洛陽而皓則書名書死亦史法也

昔舜禹躬稼至聖之德

殿本考證云稼字衍

注則天人殛之

殿本考證云宋本無人字

又皇綱弛紊 于是羣雄蜂駭 又 颺起之師跨邑 又 熊羆之族

霧集雖兵以義合

晉書陸機傳案作頓 晉書及文選辨亡論蜂並作鋒 晉

書颺作森下望颺句同族作眾集作合合作動

又 未有若此其著者也 又 飾法修師而威德翕赫

文選有作見若作如而作則 晉書飾作飭

又 而張昭爲之雄 又 而江東蓋多士矣

晉書昭作公是也蓋當時避晉諱後人復改爲昭下同其下

篇高張公之德則改之未盡者耳 晉書及文選江東上並

無而字

又 旋皇輿于夷庚

趙一清曰文選注引繁欽辨惑曰吳人以船楫爲輿馬以巨海爲夷庚夷庚者藏車之所困學記聞云左傳成十八年披其地以塞夷庚正義謂平道也二字出于此

又反帝座于紫闥 又以奇蹤襲于逸軌 叡心發乎令圖 又而加之以篤固

晉書座作坐 文選于紫闥作乎紫闥 晉書作奇蹤襲逸

叡心因令固作敬 文選發乎作因於

又旌命交于塗巷 又志士希光而景驚異人輻輳

文選于作乎 晉書希作晞輳作湊

又周瑜陸公 又出作股肱

文選注陸公謂陸遜機之祖故不言名 晉書作作為

又張溫張惇以諷議舉正

晉書脫張溫二字諷議作風義

又謀無遺算

晉書算作計文選作誦

又浮鄧塞之舟下漢陰之眾

余蕭客曰元和郡縣志鄧塞故城在襄州臨塞縣東南二十里南臨宛水阻一小山號曰鄧塞昔魏嘗于此裝治舟艦以伐吳陸士衡表稱下江漢之卒浮鄧塞之舟謂此也

又銳騎千旅 又謀臣盈室

晉書騎作師 文選謀作謨

又而我陸公亦挫之西陵 又喪氣摧鋒 又而吳藐然

文選無而字摧作挫藐作莞

又西屠庸益之郊 又虎臣毅卒

晉書屠作界恐誤西屠與北裂爲偶句也虎臣作武臣則避

唐諱耳

又明珠緯寶輝於內府珍瑰重跡而至 又齊民免干戈之患

文選輝作耀瑰作貴 晉書齊民作黎庶則避唐諱耳

又 丁奉鍾離斐以武毅稱

文選無鍾字注云丁奉字承淵少以驍勇爲小將亮卽位爲  
冠軍將軍斐將諸葛誕據壽春降魏人圍之使奉與黎斐解  
圍奉爲先登黎斐力戰有功拜左將軍黎與離音相近是一  
人但字不同 潘眉曰此卽丁奉傳之黎斐也孫琳傳亦云  
丁奉黎斐史記秦後有終黎氏世本作終離氏黎離古字通  
陳浩曰李善所見之本必可徵信但此斐字恐牧字之誤  
鍾離牧爲武陵太守以少眾討平五谿蠻事在蜀并于魏之  
後作牧爲得也

又 賀邵之屬

文選邵作劭誤本書有賀邵傳

又股肱猶良 又黔首有瓦解之志

文選良作存志作患 晉書亦作患

又卒散于陣民奔于邑

文選六臣本無此二句 晉書民作眾避唐諱也

又非有工輪雲梯之械

何焯陳景雲校文選將工改公胡果泉師曰晉書亦作工疑  
士衡謂之工輪未當輒改也

又險阻之利

文選六臣本險阻作阻險

又而有交廣 又其民怨矣

文選有作奄六臣本作掩 晉書作掩有無矣字

又劉翁因險飾智 又其俗陋矣

文選翁作公險下有以字 晉書無矣字

又吳桓王基之以武 又懿度深遠矣 又其求賢如不及

文選吳上有夫字深作宏 晉書不作弗

又以豐功臣之賞 又以納謨士之算

文選六臣本及晉書並無兩以字

又高張公之德

孫志祖曰上篇兩稱張昭此竟與其祖遜父抗一例者吳志注江表傳曰孫權於羣臣多呼其字惟呼張昭曰張公士衡之稱或卽因此 按上篇兩昭字晉書皆作公此仍是避晉諱後人追改未盡者耳

又歸魯肅之功削投惡言 又以忠臣競盡其謀

文選肅作子非也此與前篇魯肅呂蒙之儔及本篇魯肅一

面而自託句一例 晉書惡作怨誤 文選謀作謨

又 百度之缺粗修 又 雖醜化懿綱 又 抑其體國經民之具

晉書百上有故字 文選六臣本修作精綱作網民作邦

又 其財豐其器利 又 未見有宏于茲者矣

文選作其器利其財豐見作巨 晉書見亦 巨矣作也

又 借使中才守之以道善人御之有術

晉書無中才善人四字有作以

又 或曰吳蜀唇齒之國蜀滅則吳亡 又 何則其郊境之接

晉書國下有也字蜀滅上有夫字 文選滅下無則字吳亡

作亡吳 晉書無何則二字

又 陸公以四瀆 又 憑保城以延疆寇重資幣以誘羣蠻

文選無陸字保作寶重資作資重

又北據東坑又分命銳師三千又言守險之由人也

文選三作五由作在 趙一清曰東坑顧承陳武傳俱作章坑李善曰東坑在西陵步闡城東北長十餘里陸抗所築之城在東坑上而當闡城之北其跡並存

又或曰亂不極則治不形

文選或曰作元曰是也此太元經之文上引易曰下引元曰正一例也晉書亦誤

又先政之業易循也

文選政作攻業作策是也 晉書循作修

又故先王達經國之長規又恭己以安百姓又危與下同患

文選故上有是字恭作謙同作共

三國志旁證卷二十七終

三國志旁證卷二十八

閩長樂梁章鉅撰

劉繇傳 東萊牟平人也

沈欽韓曰登州府志牟平城在府城東南九十里漢縣北齊天保元年移縣於黃縣東南馬嶺山此城遂廢 洪亮吉曰長廣郡魏分東萊北海置領縣六有牟平

注 繇祖父本又寵字祖榮

按後漢書劉寵傳本作丕蓋本丕字形相近亦不能斷其孰是也祖榮作榮祖

又 山陰縣氏去治數十里有若邪中在山谷間

趙一清曰氏當作民中字疑衍劉寵傳云山陰縣有五六老叟龐眉皓髮自若邪山谷間出

繇兄岱字公山歷位侍中兗州刺史

劉寵傳云初平三年青州黃巾賊入兗州殺任城鄭遂轉入東平岱擊之戰死

除下邑長

按元和郡縣志云後漢無下邑縣魏復立今考續漢書郡國志梁國治下邑則云魏復立者誤矣

貪穢不循

殿本考證云册府元龜循作脩

振武將軍衆萬餘人

劉寵傳振武作振威 殿本考證云宋本萬餘人作數萬人

遂沂江南保豫章駐彭澤

太平寰宇記卷一百六云劉繇城在南昌縣東北三十八里

孫策畧地於曲阿攻劉繇敗奔豫章築城自保今人號爲劉繇城

注不願命名義者也

殿本考證云冊府元龜無命字

繇尋病卒

水經沔水注云丹徒縣北二百步有故城本毗陵郡治舊去江三里岸稍毀遂至城下城北有劉繇墓淪於江

笮融者丹陽人初聚衆數百往依徐州牧陶謙謙使督廣陵彭城運漕遂放縱擅殺坐斷三郡委輸以自入

陳景雲曰上只云廣陵彭城而下言三郡殊不相應後漢書廣陵下有下邳二字疑此脫

因酒酣殺昱

一本作阻誅殺昱誤今 殿本已改正

後策西伐江夏

一本作路住江夏誤今 殿本已改正

遷基大農

按大字下當脫司字虞翻張溫傳並作大司農

太史慈傳君欲通章耶 又章題署得無誤耶

沈欽韓曰蔡邕獨斷凡羣臣上書於天子者有四名一曰章

需頭稱稽首上書謝恩陳事詣闕通者也凡章表皆啟封其

言密事得皂囊盛又曰釋名書文書檢曰署檢禁也禁閉諸物不得開露也

署子也題所予者官號也

策卽解縛捉其手曰甯識神亭時邪若卿爾時得我云何

杭世駿曰獻帝春秋云策獲太史慈謂曰孤昔與卿神亭之

役若爲卿先如何慈謂曰不敢面欺若兜牟帶不斷未可量也 沈欽韓曰元和郡縣志古神亭在潤州延陵縣西北二十五里元豐九域志熙甯五年省延陵縣爲鎮延陵鎮在丹陽縣南三十五里

注臣松之案吳歷云慈於神亭戰敗爲策所得與本傳大異疑爲謬誤

杭世駿曰卮林云慈若於神亭見囚則策方解縛而遽云甯識神亭何其倉卒不次又當言今日得我云何不宜言爾時也按呂範傳範從孫策攻太史慈於勇里乃知神亭時慈獲策兜鍪而勇里時策致慈縲綬裴蓋未之深核也

又龍欲騰翥先階尺水者也

按水當作木此誤酉陽雜俎云龍頭上有一物如博山形名

尺木龍無尺木不能升天

注但其後不達臣節

殿本考證云宋本達作遵

治海昏

太平寰宇記卷一百六云太史城在洪州奉新縣西四十里後漢末太史慈創置周回三里西南有城角山東南有盤山北枕江水其地險固基址尙存

以手持樓棼

潘眉曰許慎解棼屋棟也徐鍇讀若曾參之參

子亭官至越騎校尉

明監本亭作享誤今殿本已改正

士變傳其先本魯國汶陽人

元和郡縣志云故汝陽城在兗州龔邱縣東北五十四里按  
卽今兗州府甯陽縣

注  
會卓入闕

殿本考證云闕疑作關

交州刺史朱符爲夷賊所殺

錢大昕曰薛綜傳故刺史會稽朱符多以鄉人分作長吏侵  
虐百姓強賦於民百姓怨叛山賊並出攻州突郡符走入海  
流離喪亡不云爲賊所殺

蕭弟武領海南太守

殿本考證云宋本海南作南海是也 潘眉曰交州無海南  
郡或是日南耳 按漢書地理志南海郡秦置秦敗尉佗王  
此地武帝元鼎六年開屬交州

耽玩春秋爲之注解

隋書經籍志有士燮春秋注十二卷又梁有士燮集五卷

注仙人董奉以一丸藥與服以水含之捧其頤搖稍之

太平寰宇記卷一百二十八云杏山在濠州南六十里吳時  
神仙董奉居此山爲人治病惟令種杏五株數年杏至萬株  
李龍官曰搖稍二字不可解稍疑作捎廣韻搖捎動也蓋  
謂捧其頭搖動之也

漢遺張津爲交州刺史

侯康曰晉書地理志建安八年張津爲交阯刺史士燮爲交  
阯太守共表立爲州乃拜津爲交州牧藝文類聚卷六引苗  
恭交廣記曰建安二年南陽張津爲交阯太守士燮表言伏  
見十二州皆稱曰州而交獨爲交阯刺史何天恩不平乎若

普天之下可爲十二州者獨不可爲十三州詔報聽許拜津

交州牧加以九錫彤弓彤矢禮樂征伐威震南夏與中州方

伯齊同自津始也按二書所載事同而一以爲建安八年約

亦以爲一以爲二年攷孫討逆傳注引王範交廣春秋建安

六年張津已爲交州牧則云八年者非也又此傳上文稱交

州刺史朱符此是史臣追稱符爲刺史時實未名州也

楊雄有交

州歲此乃文人之詞非當時實錄

而荊州牧劉表遣零陵賴恭代津

錢大昭曰賴恭爲先主鎮遠將軍官至太常

表又遣吳巨代之

錢大昭曰薛綜步騭傳亦作吳巨惟蜀先主傳注引江表傳

作吳巨恐誤

率郡人民使遙東附

明監本遙作搖誤今殿本已改正

封龍編侯

顧祖禹曰龍編城在今安南國交州府東

蓋庸才玩富貴而恃阻險

殿本考證云宋本無阻字

吳夫人傳孫破虜吳夫人

按魏志於三少帝後卽繼以后妃傳蜀志亦於後主後卽列二主妃子而吳志於三嗣王後獨爲劉繇太史慈士燮三傳然後敘述妃嬪宗室不知於例若何也

本吳人徙錢塘早失父母與弟景居

太平寰宇記卷九十一云姑蘇山西北十二里胥口東岸有

漢奉車都尉衡州刺史吳輝墓輝丹陽太守吳景父也

生四男一女

錢大昭曰諸葛瑾傳孫權姊婿曲阿宏咨見而異之疑卽一  
女之夫也

注策功曹魏騰以迂意見譴

殿本考證云太平御覽魏騰作魏勝 盧明楷曰吳範傳作

魏勝注引忤策幾殆賴太妃救得免事與此合蓋騰與勝音  
同勝則騰字之譌耳

建安七年臨薨注此則吳后以十二年薨也

按此書七年者當因下文八年景卒官之文而誤

謝夫人傳父暝漢尚書郎徐令又弟承撰後漢書百餘卷

隋書經籍志謝承後漢書一百三十卷無帝紀又集四卷

困學紀聞云謝承父暎爲尚書郎每讀高祖及光武之後將  
相名臣策文通訓條在南宮祕於省閣惟臺郎升複道取急  
因得開覽 趙一清曰閻百詩云陽曲傅山謂永樂間揚州  
曾有謝承後漢書刊本案傳徵君非妄言者曾與莆田鄭王  
臣晤於京師渠云閩中舊家有此書彼親見來以爲他日訪  
求之迹也

後權納姑孫徐氏欲令謝下之

何焯曰三國之君皆不知正家納再婚之女而反使聘嫡下  
之此權晚年所以繼嗣不定也

徐夫會吳景委廣陵來東復爲丹陽守注乃復用景召琨還矣

人傳殿本考證云宋本還矣作還吳

平魏將軍

按此所謂雜號將軍惟吳置之徐祚及朱績鍾離牧三人  
步夫人傳生二女長曰魯班字大虎前配周瑜子循後配全琮少曰  
魯育字小虎前配朱據後配劉纂

按以金枝玉葉之貴而同時再醮恬不爲怪當時之風尙可  
知矣 抱朴子譏惑篇云吳之善書則有皇象劉纂岑伯然  
朱季平皆一代之絕手也

注吳歷曰纂先尙權中女早卒故又以小虎爲繼室

何焯曰繼室之名於時已謬故委巷之書君子所慎

惟赤烏元年閏月戊子

潘眉曰是年魏閏十一月吳閏十月魏用景初歷吳自用夏  
正按其時蜀與吳同實魏景初二年也

今使持節丞相醴陵亭侯雍

錢大昭曰顧雍傳雍初封陽遂鄉侯進封醴陵侯子裕襲醴陵侯蓋由鄉侯進封縣侯也亭字衍

葬於蔣陵

六朝事迹云今蔣子文廟相對向西有曰孫陵岡是爲蔣陵赤烏元年追拜夫人步氏爲皇后後合葬蔣陵今蔣廟西南孫陵岡上有步夫人墩墩之側有夫人冢乃其地也

全夫人傳尙將家屬徙零陵道見殺

殿本考證云宋本道作迨 按道一本又作迨

何姬傳植宣成侯

錢大昕曰宣成當作宣城

子邈嗣爲武陵監軍

太平寰宇記卷一百五云武林城在池州貴池縣東北二十

五里孫休爲瑯琊王鎮武林城其後何遜爲武陵城都督卽此城林陵音同通用 趙一清曰遜爲監軍樂史云都督非也

注 欲還誅都都叔父信

殿本考證云宋本作欲還秣陵誅都信作植

孫靜傳 四維然火誑朗

殿本考證云宋本作羅以然火

夜投查瀆道襲高遷屯

顧祖禹曰查瀆在蕭山縣西南九里水經注浙江東逕查塘謂之查瀆高遷屯在縣東北五十里亦曰高遷亭又名柯亭

瑜字仲異

錢大昭曰以下文孫皎孫奐例之瑜上當有孫字

瑜五子彌熙耀曼紘又皎子咨彌儀

按皎傳子允爲丹陽侯卒弟晞嗣弟咨彌儀皆將軍錢大昭曰皎與瑜皆孫靜子瑜子旣名彌皎子必不同名且下文但曰咨儀不及彌疑彌字衍文

與周瑜共討麻保二屯破之

水經江水注云白沙口一名沙屯卽麻屯口也本名蔑默口江浦矣南直蒲圻州水北入百餘里吳所屯也顧祖禹曰麻屯口在武昌嘉魚縣陸口東保屯地蓋相近

委盧江劉靖以得失

趙一清曰劉靖之名一見孫堅傳爲董卓司馬一見魏志劉馥之子也與此爲二

降高城

顧祖禹曰高城故城在荊州府松滋縣東漢所置縣屬南郡  
後漢廢入孱陵

壹入魏黃初三年死

錢大昕曰壹以孫亮太平二年奔魏卽魏甘露二年也距文  
帝黃初三年已三十六年矣此云黃初必誤魏志高貴鄉公  
紀甘露四年十一月車騎將軍孫壹爲婢所殺蓋壹入魏三  
年而死耳黃初二字當是衍文何焯以黃初爲首尾二字

孫貢  
傳注因而獲免

明監本獲作後誤今 殿本已改正

鄰年九歲代領豫章

殿本考證云九歲無領郡理疑年下脫十字

重安長

後漢書郡國志云零陵郡重安故鍾武永建三年更名

論者多有爲言

明監本作多爲有言誤今 殿本已改正

孫輔遣使與曹公相聞 注 輔恐權不能保守江東因權出行東

冶乃遣人齎書呼曹公行人以告權

陳景雲曰輔之得罪史不著其年以阮瑀代曹公與權書攷之蓋在赤壁之役後也是時江東乘戰勝之勢霸業已安輔不當復有懼心其通使曹公殆自有他志非慮權之不克保國也權雖領會稽太守然自以將軍屯吳不過使丞之郡行文書而已攷之吳志終權之世未嘗一至會稽况東冶僻在海隅何暇遠涉其地此魚豢所紀殆不可信

孫翊傳注 典畧曰翊名儼

趙一清曰於文當云一名儼

注故列於後孫皓傳云

趙一清曰皓乃詔之譌

子松黃龍三年卒蜀丞相諸葛亮與兄瑾書曰旣受東朝厚遇依依於子弟又子喬良器爲之惻愴見其所與亮器物感用流涕其悼松如此由亮養子喬咨述故云

潘眉曰書中言子喬良器子喬卽孫松之字松字子喬猶喬字伯松字義相應也伯松喬者亮養子諸葛瑾之子繼亮後者也自吳來爲亮述子喬松事甚詳故因其沒而悼之如此又曰孫輔傳子松一段最不可解子喬乃瑾子出繼亮爲後者所謂依依於子弟及與亮器物果何謂也豈松託喬附致器物於亮耶然文義究不明晰按松乃孫翊子在翊傳不在

輔傳因二傳相連遂以爲孫輔傳誤一也子喬者松也喬者亮之養子也合兩子喬爲一誤二也養子喬三字成文當於養子二字畧逗若截子喬二字爲名則亮養二子作何解誤三也使書中子喬卽是亮養子則亮自與兄書言其子之爲人與孫翊何涉乃不載於亮瑾二人傳而載於此耶况傳明言悼松如此顯以子喬爲松而以爲文義不明晰竊所未解松以黃龍三年卒亮養子喬已沒九年 錢大昭曰子喬疑是松之字也亮兄瑾子喬自吳至蜀故咨述松事而亮傷之也亮以喬爲己適子當云兄子不得謂之養子

孫匡傳注

匡爲定武中郎將遺範令

又禁固終身

何校遣改違固改錮

秀公室至親握兵在外

殿本考證云宋本握兵作捉兵毛本作提兵

孫部傳後爲將軍屯京城

顧祖禹曰鎮江府後漢屬吳郡三國吳曰京口鎮建安十三年孫權自吳徙治丹徒號曰京城十六年遷建業復於此置京督爲重鎮京城今府治春秋之朱方也

卽拜丞烈校尉又後爲廣陸太守

丞當作承陸當作陵

自權西征還都武昌

潘眉曰陳仁錫本以征字絕句今按還字當屬上西征爲句吳主初屯兵吳建安十六年徙治秣陵十七年改秣陵爲建業黃武二年都鄂改鄂爲武昌武昌至是始都不得云還都武昌也吳主傳黃龍元年遷都建業因故府不改似當云還

都而云遷都者以前此徙治建業猶未卽尊未得都名故不  
曰遷都孫皓甘露元年徙都武昌寶鼎元年還都建業則書  
還都矣

孫桓

桓斬上堽道截其徑要

沈欽韓曰水經注江水篇孫桓奮不顧命斬上夔道是堽應  
作夔也又曰上當是土謂削土填道耳

注

慎子丞字顯世

晉書丞作拯下同

注

皆當如今宗室

太平御覽卷二百二十一引作皆當令如宗室

張昭

傳 一則仲父二則仲父

韓非子難篇云齊桓公時晉客至有司請禮桓公曰告仲父

者三而優笑曰易哉爲君一曰仲父二曰仲父

策臨亡以弟權託昭昭率羣僚立而輔之注吳歷曰策謂昭曰

若仲謀不任事君便自取之

按此與昭烈付託後主之言前後如出一轍然阿斗昏稚先  
主自不失知人之明而仲謀英勇蓋世乃兄亦作此語將誰  
欺乎可見當日君臣都以權術相尙恐孔明子布亦早應竊  
笑矣

拜昭爲綏遠將軍

潘眉曰陸績述元稱安遠將軍彭城張子布攷雜號有綏遠  
無安遠魏于禁曾爲安遠將軍或是三國時有此號今當以  
綏字爲正 按建安中士燮士徽魏唐咨蜀鄧方王嗣皆曾  
爲安遠將軍不止于禁一人不得謂雜號有綏遠無安遠也

注吳錄曰昭與孫紹滕允鄭禮等採周漢撰定朝儀

趙一清曰孫紹卽孫長緒本作劭

權於武昌臨釣臺飲酒大醉

水經江水注云樊山北背大江江上有釣臺權嘗極飲其上  
爲共作樂耳公何爲怒乎

錢大昭曰江表傳權與屬多呼其字唯呼張昭曰公本傳屢  
見之又諸葛恪傳權曰卿其能令張公詞屈乃當飲之耳亦  
稱爲公

領丞相事煩

殿本考證云通鑑領作顧

注江表傳曰昭忠嘗亮直有大臣節權敬重之然所以不相昭  
者蓋以昔駁周瑜魯肅等議爲非也臣松之以爲張昭勸迎曹

公所存豈不遠乎夫其揚休正色委質孫氏誠以厄運初遭塗炭方始自策及權才畧足輔是以盡誠匡弼以成其業上藩漢室下保民物鼎峙之計本非其志也又然則昭爲人謀豈不忠且正乎

厲鶚曰孫氏初起江東有會稽丹陽豫章吳郡之地桓王不幸死於貢客昭受遺輔政奉孝廉於戎馬間犯顏強諫有大臣風而位亞三司不登丞相權眞多忌哉將毋烏林之戰昭勸迎操委質策名之義安在權之秉衡炯如也夫昭習春秋覽羣書甯不如瑜之知操爲漢賊也特懾於稚琮以荆土降曹兵號八十萬將有水陸席卷之勢不勝欲保妻子遂舉討逆破虜之遺烈一旦思灰滅之壽雖不書江表傳言之詳矣然壽雖良史魯肅吳之鄧禹謀定鼎足與武侯埒乃討祖

表斥爲少年羸疎者昭也厥後勸迎操者衆非昭誰倡耶裴  
松之以此段爲忠且正駟其可追耶使昭之言得行吳之君  
臣將稽顙許下求守舊國之不得昭烈安能據上游帝全蜀  
耶是操之迎不迎吳蜀與亡共之矣天祐孫劉以敵曹故生  
肅瑜並時耳軍旅之事將軍後酒食之事將軍先誕之嘲昭  
有愧焉迨公孫淵在遼東懼魏稱藩昭策兩使之不返有如  
著蔡彼利害不切於身已所見誠遠且大以互注者巧以金  
注者昏人臣之懷二心未有如昭者也壽猶以爲忠謬方直  
動不爲己夫以方盛之吳而欲折入於魏彼譙叟將笑之矣  
峻因誦孝經仲尼居昭曰嚴峻鄙生臣請爲陛下誦之乃誦君  
子之事上咸以昭爲知所誦

此引古文孝經乃真古文也今孝經正義引古文孝經作仲

尼閒居乃偽古文也三國時偽書未出故峻所引無閒字與說文所引合 說文作尻古今字異耳 南史王儉傳云齊高帝使陸澄誦孝經起自仲尼居儉曰澄所謂博而寡要臣請誦之乃誦君子之事上章蓋襲張昭之事也

造作攻城大攻車

殿本考證云下攻字疑衍

至平州都督

陳景雲曰吳無平州當是半州之誤吳主于建昌侯慮嘗鎮半州又大將甘甯潘璋亦嘗屯此乃中流重地故特置都督如西陵潘須之比也 紀文達師曰平州晉書作半洲見庾懌褚裒二傳元和郡縣志晉太康十年分豫章郡陽廬江等郡之地置江州惠帝分廬江之潯陽武昌之柴桑置潯陽郡

自東晉元帝至蕭齊或理半洲隋改潯陽爲溢城縣武德五年復改爲潯陽縣半洲故城在縣西九十里吳孫慮出鎮於此築城云云據吉甫所志合之稽裒除江州刺史鎮半洲卽吳志之半洲無疑 按趙一清言平州在遼東此是遙領恐未攷也

出爲長沙西部都尉

趙一清曰兩漢無長沙西部都尉疑是吳立孫亮太平二年分爲衡陽郡

拔彭城蔡款 注 款字文德

錢大昭曰周昭論作蔡文至與吳錄異 盧明楷曰卽名求

義作文至於款更協

顧雍傳 蔡伯喈從朔方還嘗避怨於吳雍從學琴書 注 故雍與伯

嗜同名由此也

潘眉曰雍邕古字通用 殿本考證云毛本無由此二字

拜侯還寺而家人不知

林暢園師曰漢九卿謂之九寺時雍累遷大理奉常職在九卿故曰還寺

典校諸官府

殿本考證云毛本官作宮

遂造作榷酤障管之利

按禮王制鄭注名山大澤不以封者與民同財不得障管亦賦稅之而已蕭常後漢書謂王莽設六管之利酤酒賣鹽鐵器鑄錢名山大澤也此卽榷酤障管之利

注是以潘濬欲同手劍之

殿本考證云宋本作欲因會手劍之

次于裕有篤疾

注

雍母弟徽子裕字季則

潘眉曰雍次子名裕母弟徽之子亦名裕必有一誤或疑注中子裕卽雍次子是一人然旣云有篤疾不能襲爵而又云少知名位至鎮東將軍當是兩人也

邵字孝則

殿本考證云太平御覽孝則作孝時

生於庶民

殿本考證云太平御覽作生於民庶

烏程吾粲

殿本考證云毛本吾粲作吳粲 何焯曰古書吾邱壽王多

作虞邱而虞仲亦作吳仲庾信作吳明徹墓誌用吾彥事對

吳起據此則吾與吳同

秉雲陽太守

錢大昕曰雲陽卽漢吳郡之曲阿嘉禾三年更名其置郡當在嘉禾後也晉志敘吳所置郡不及雲陽蓋不久卽省

譚字子默

太平御覽卷三百八十九引顧譚別傳云譚字子嘿嘗慕賈誼之爲人身長七尺八寸少言笑容貌矜整有珪璋威重未嘗失色於物非其人或終日不言

注

太傅諸葛恪等雄奇蓋衆

殿本考證云宋本等作以

陷沒五營將秦兒軍

錢大昕曰兒當作晃 潘眉曰秦晃見吳主傳赤烏四年

著新言二十篇

隋書經籍志儒家顧子新語十二卷吳太常顧譚撰

還屯軍章阮

殿本考證云章阮宋本作章阮 沈欽韓曰陳武傳亦作章

阮按呂覽九塞高誘注冥阨荆阮方城皆在楚章阮當卽荆

阮蓋章山也方輿紀要內方山在荆門州東百八十里

諸葛瑯邪陽都人也注其先葛氏本瑯邪諸縣人後徙陽都陽

都先有姓葛者時人謂之諸葛因以爲氏

何焯曰廣韻注引作時人謂徙居者爲諸葛

又風俗通曰葛嬰爲陳涉將軍有功而誅孝文帝追錄其孫諸

縣侯因并氏焉

何焯曰孝文帝時候者十人無姓葛者高祖僅封樂毅後于

一鄉嬰何功德而其孫乃食一縣此風俗通之謬也  
禮曾有以望之

漢書汲黯傳云黯褊心不能無少望音義望怨也

顏氏之德使人加親

史記仲尼弟子列傳孔子曰自吾有回門人益親

注紆曹公移都之計

各本紆俱作行誤今 殿本已改正 李龍官曰作紆爲是  
當日雲長威震華夏操恐懼欲遷都以避之今荊州爲權所  
破遷都之計可以緩也

有以保分

殿本考證云冊府元龜作有以保全

聞皆選用忠良寬刑罰市恩惠薄賦省役以悅民心

趙一清曰晉書楊駿傳駿自知素無美望懼不能輯和遠近乃依魏明帝卽位故事遂大開封賞欲以悅衆則知曹叡嗣統之初曲媚人情宜其見輕於敵國也

比之於操萬不及也

殿本考證云比疑作不以操笮其頭

沈欽韓曰一切經音義笮猶壓也

注一門三方爲冠蓋天下榮之

世說品藻篇云瑾弟亮及從弟誕並有盛名各在一國於時以爲蜀得其龍吳得其虎魏得其狗

注融部曲吏士親附之疆外無事

何焯曰此十二字疑當屬下文秋冬句上亦陳氏正文也

步隲傳會稽焦征羌郡之豪族

錢大昭曰史家敘事例得稱名此志中如司馬德操徵宋仲

子忠劉伯安

虞

許文休

靖

任定祖

安

秦子勅

宓

之類不可枚

舉此又稱其官更非史例臧洪傳稱劉兗州公山岱孔豫州公緒伯則又官字並舉尤爲變格也

建安十五年出領鄱陽太守歲中徙交州刺史

侯康曰藝文類聚四引鄧德明南康記云昔有盧耽仕州爲治中少學仙術善解飛騰每夕輒凌虛歸家曉則還州嘗元會至晚不及朝列化爲白鶴至閣前徊翔欲下威儀以箒擲之得一隻履躡驚還就列內外左右莫不駭異時步隲爲廣州刺史意甚惡之便以狀列聞遂至誅滅按本傳稱爲交州南康記作廣州者據其後名之蓋步隲爲交州在建安十六

年其時交州治番禺後因呂岱之請分交州置廣州交州治龍編廣州治番禺然則步騭時之交州卽後來之廣州也

劉表所置蒼梧太守吳巨陰懷異心外附內違騭降意懷誘請與相見因斬徇之威聲大震士燮兄弟相率供命南土之賓自此始也

水經浪水注云王氏交廣春秋曰建安十六年吳遣臨淮步騭爲交州刺史將武吏四百人之交州道路不通蒼梧太守長沙吳巨擁衆五千騭有疑於巨先使諭巨巨迎之於零陵遂得進州巨旣納騭而後有悔騭以兵少恐不存立巨有都督區景勇畧與巨同士爲用騭惡之陰使人詣巨巨往告景勿詣騭騭請不已景又往乃於廳事前中庭俱斬首以徇衆又曰騭殺吳巨區景使嚴舟船合兵二萬下取南海

權遂命騰上益陽

明監本遂作逆誤今殿本已改正

猶或緬焉未之能詳

錢大昭曰緬猶泯也言泯泯焉未能詳沈欽韓曰廣韻緬

遠也韋昭楚語注緬猶遠也

陽於是條于時事在荊州界者諸葛瑾陸遜朱然程普潘濬裴元夏侯承衛旌李肅周條石幹十一人甄別行狀

陳景雲曰騰所條上諸臣皆當時有聲績於荊州者程普之卒在吳主稱尊號前不應亦列其中恐傳錄誤也時呂岱在荊州其名跡亦葛陸之儔騰獨遺之爲不可曉或程普乃呂岱之謫如魏志夏侯惇傳中以雲長爲呂布也

注權擢以爲選舉號爲得才

殿本考證云太平御覽以爲下多選曹尙書四字

齊桓用管仲被髮載車

沈欽韓曰韓非子外儲說右下桓公之霸也內事屬鮑叔外  
事屬管仲桓公被髮而御婦人日游于市論衡書虛篇桓公  
負婦人而朝諸侯說苑鮑叔言桓公姪娣不離懷衽此皆襄  
公下流之謗而集於桓公耳

近漢高祖擧三傑以興帝業

錢大昭曰漢三傑之稱始此謂蕭何韓信張良也

哲人惟刑

錢大昕曰哲當作折用呂刑折民惟刑語

竊聞諸縣並有備吏吏多民煩俗以之弊

沈欽韓曰此所謂散吏也隸續南陽郡吏題名從掾位者南

鄉王皓等五十六人從史位順陽五肅等十人容齋隨筆晉南鄉太守司馬整碑陰故吏題名從掾位李奉等十五人費鳳碑溧陽校官碑皆有之則縣之備吏久矣

注後有呂範諸葛恪爲說隲所言

殿本考證云有疑作與

十一年卒

錢大昭曰吳主傳步騭卒於赤烏十年五月此一字衍

闡累世在西陵

水經江水注云江水出峽東南流逕故城洲洲附北岸洲頭曰郭洲長二里廣一里上有步闡故城方圓稱洲周迴畧滿故城洲上城周一里吳西陵督步騭所築也

叔嗣雖親貴言憂其敗

盧明楷曰張承傳稱能甄識人物嘗言終敗諸葛氏者元遜也叔嗣爲承弟休之字傳無憂敗之言疑叔嗣當作元遜稱之甚美故詳錄焉

詳一本作辭誤今殿本已改正

張紘傳少游學京都

殿本考證云宋本無少字

出紘爲會稽東部都尉

何焯曰漢地理志會稽但有西部南部都尉趙明誠金石錄有永平八年所造會稽東部都尉路君闕銘在未分吳郡之前蓋班書畧之也其居是官者惟紘見于史焉

注吾欲圖徐州宜近下也臣松之以爲秣陵之與蕪湖道里所校無幾於北侵利便亦有何異而云欲闕徐州貪秣陵近下非

其理也

錢大昕曰秣陵與廣陵隔江相對而廣陵屬徐州部權意欲都秣陵以圖廣陵故云欲圖徐州裴氏譏之殆未審於地理矣

非無忠臣賢佐開於治體也

殿本考證云闕疑作諳

紘著詩賦銘誄十餘篇

隋書經籍志後漢討虜長史張紘集一卷梁二卷錄一卷

注 紘見相榴枕愛其文爲作賦

按藝文類聚七十張紘瓌材枕賦疑卽此篇也紘又有瓌材枕箴亦載藝文類聚

又 又善楷篆書與孔融書自書

殿本考證云元本作嘗與孔融書自書

子元官至南郡太守尙書

潘眉曰前云臨困授子靖留牋則紘子名靖此作元者疑因靖旁脫譌又譌立成立耳

注江表傳曰稱尙有俊才

殿本考證云曰字疑衍

尙因道晉平公使師曠作清角曠言吾君德薄不足以聽之皓意謂尙以斯喻已不悅後積他事下獄皆追以此爲詰

按皓本使尙鼓琴尙旣對以不能而復說此事宜爲皓所不容也此事見韓非十過篇云晉平公曰清角可得而聞乎師曠曰不可昔者黃帝合鬼神于太山之上駕象車而六蛟龍大合鬼神作爲清角今主君德薄聽之將恐有敗平公曰寡

人老矣所好者音也願遂聽之師曠不得已而鼓之一奏而有元雲從西北方起再奏之大風至大雨隨之裂帷幕破俎豆坐者散走平公恐懼伏于廊室之間晉國大旱三年平公之身遂癘病

注

詣宮叩頭請罪尙得減死

殿本考證云宋本作叩頭請尙罪得減死 按通鑑考異引三十國春秋亦作請尙罪

送建安作船

太平寰宇記卷百云福州古閩越地漢立冶縣以越王冶鑄爲名屬會稽郡尋爲東冶縣後漢改爲侯官都尉後分冶地爲會稽東南二都尉此爲南部都尉東部今臨海是也吳於此立典船都尉主謫徙之人作船於此

嚴峻傳注 凱官至升平少府

潘眉曰孫皓太后稱升平宮

元字彥黃下邳人也亦有學行

隋書經籍志裴氏新言五卷吳大鴻臚裴元撰

闕澤傳 赤烏五年拜太子太傅

潘眉曰法苑珠林破邪篇引韋曜吳書澤以赤烏四年拜太子太傅按四年太子登也五年太子和也登傳不載澤爲太子和傳云赤烏五年立爲太子闕澤爲太傅然則韋曜書云非矣 黃凱釣曰韋曜吳書以康僧會來到遂感舍利下勅闕澤澤曰諸佛設教天法奉行不敢違佛吳主大悅以澤爲太子太傅愚謂澤以儒學勤勞封侯不應以佞佛拜太傅陳書削之是也

又著乾象厯注

隋書經籍志乾象厯三卷吳闞澤撰梁有乾象厯五卷漢劉洪等注又有闞澤注五卷又宋厯志闞澤受劉洪乾象法於東萊故孫氏用乾象厯至於吳亡

官府小吏

殿本考證云宋本官府作官府

丹陽唐固亦修身積學稱爲儒者著國語公羊穀梁傳注

按隋書經籍志有唐固注國語二十一卷注穀梁傳十三卷而無公羊傳注

薛綜傳沛郡竹邑人也

一統志竹邑故城在鳳陽府宿州北 洪亮吉曰竹邑漢舊

縣魏屬汝陰郡

召綜爲五官中郎

殿本考證云元本中郎下有將字

趙佗起番禺懷服百越之君珠官之南是也

錢大昭曰珠官卽合浦也黃武七年更名宋志云孫亮復舊  
由此已降四百餘年

陳浩曰自錫光任延至此時尚未及三百年此云四百餘年  
疑誤 趙一清曰四字恐二字之誤

珠崖除州縣嫁娶皆須八月引戶

殿本考證云各本除作餘按文義似謂州縣之中猶存禮化  
除此之外則嫁娶由已不由父母也作餘非 按引戶卽古  
之案比周官司徒職注鄭司農云漢時八月案比後漢書江  
革傳縣當案比注猶今兒閱也冊府元龜卷四百八十三隋

開皇三年四方疲人或詐老或少規免雜賦高祖乃令州縣大索貌閱戶口不實者正口遠配

交阯糜泠九真都龐

潘眉曰糜泠漢書地理志續漢書郡國志並作麓泠按糜麓字皆誤也考說文米部菴字許慎曰交阯有菴泠縣从米尼聲知字當爲菴也都龐前漢舊縣後漢省此有都龐當是漢末復置耳

龐音龍

南海黃蓋爲日南太守

錢大昕曰此別是一人非黃公覆也

九真太守儋萌

錢大昭曰以下文證之萌當爲明

後得零陵賴恭先輩仁謹不曉時事

錢大昕曰賴恭先仕蜀官至太常而志不立傳以士燮傳及此傳參考之蓋建安中劉表承制授恭交州刺史爲蒼梧太守吳巨所逐遂歸先主也

不爲恭服所取相怨恨

殿本考證云冊府元龜無所字取作輒

有士民之變

趙一清曰民當作氏謂士燮子徽也

器械銖鈍

淮南齊俗訓云其兵戈銖而無任高誘注楚人謂及鈍爲銖

注  
綜陳讓紫色非所宜服

何焯曰左傳曰渾良夫紫衣狐裘杜預注紫衣君服

凡所著詩賦難論數萬言名曰私載又定五宗圖述二京解皆

傳於世

隋書經籍志薛綜集三卷錄一卷又注張衡二京賦二卷  
鑿聖谿以通江淮

沈欽韓曰聖溪疑青溪之古名江南通志潮溝在江甯府治  
西客座贅語云吳赤烏中鑿潮溝以引江水連青溪南抵秦  
淮西通運瀆北接後湖今舊內城下流入竹橋者其故迹也  
按赤烏年無此事當是孫皓時也

皓遂召瑩還爲左國史

隋書經籍志後漢紀六十五卷本一百卷晉散騎常侍薛瑩  
撰

周瑜傳注景父榮章和世爲尙書令

後漢書作景祖父榮

徙家於舒

顧祖禹曰周瑜城在廬州府舒城縣西十八里瑜從孫策舉兵徙家於舒因築此城今爲淨梵寺

吾得卿諧也

殿本考證云元本作吾得卿事諧也

遂從攻橫江當利

蕭常續後漢書音義云在江北孫策征劉繇濟於橫江大破之于牛渚卽采石磯周瑜從攻橫江當利乃東渡擊秣陵則知在江北

皆呼爲周郎

沈欽韓曰此六朝以前呼年少者之通稱故袁術呼陸績爲陸郎王僧虔爲御史中丞曰此是烏衣諸郎坐處

出備牛渚

潘眉曰通典當塗縣有牛渚圻亦謂之采石吳爲重鎮吳氏曰大江之南上自荆岳下至常潤不過十郡十郡之間其要不過七渡上流最緊者三荆南之公安石首岳之北津中流最緊者二鄂之武昌太平之采石下流最緊者二建康之宣化鎮江之瓜州

時得橋公兩女

沈欽韓曰橋公者太尉橋元也漢制爲三公者方稱公 太平寰宇記卷百二十五云舒州懷甯縣有橋公亭在縣北隔皖水一里漢末橋公有二女孫策與周瑜各納其一今亭基爲雙溪寺

留鎮巴邱

注

應在今巴邱縣也與後所平巴邱處不同

盧明楷曰本傳後云瑜還江陵爲行裝而道於巴邱病卒裴注云瑜所卒之處在今之巴陵與瑜所鎮之巴邱名同地異據此則平字當作卒沈欽韓曰留鎮巴邱卽一統志所云巴邱故城在臨江府峽江縣北隋開皇中併入新塗縣是也道於巴邱病卒則一統志所云巴邱故城卽今岳州府治是也

還備官亭

官亭當作宮亭卽宮亭湖也水經廬江水注云廬山之北有石門水水出嶺端南嶺卽彭蠡澤西天子鄣也峯磴絕峻人跡罕及嶺南有大道順山而下有若畫焉傳云匡先生所通至江道巖上有宮殿故基者三以次而上最上者極於山峯山下又有神廟號曰宮亭廟故彭湖亦有宮亭之稱焉

將士聞之皆恐懼延見羣下問以計策

殿本考證云毛本恐懼下有權字宋本元本并無懼字  
老賊欲廢漢自立矣

通鑑自立下有久字

注  
江表傳曰

何焯曰此則多採諸葛語增飾之故陳氏畧焉

然觀操軍方連船艦首尾相接

殿本考證云宋本無方連二字

悉延燒岸上營落頃之煙炎張天

殿本考證云太平御覽作燦炎張天燦炎謂飛火也

注  
同時發火火烈風猛往船如箭飛埃施爛燒盡北船延及岸

邊營若瑜等率輕銳軍繼其後雷鼓大進北軍大壞曹公退走

殿本考證云發火毛本作舉火往船通鑑作船往施爛毛本作絕爛營砦宋本作營柴 太平御覽卷七百七十一引英雄記云曹操北至江上欲從赤壁渡江無船作竹簰使部曲乘之從漢水下出大江浦口未卽渡周瑜夜密使輕船走舸百艘艘有五十人施棹人持炬火者數千人萃於簰乃放火火然卽回船遠去須臾燒數千簰火起光上照天操乃夜走以下雋漢昌劉陽州陵爲奉邑

潘眉曰奉邑字見史記河渠書謂官所食與封邑異後魯肅代瑜領兵則四邑屬肅肅卒呂蒙亦食下雋劉陽漢昌州陵四邑 沈欽韓曰一統志漢昌故城在岳州府平江縣東下雋故城在辰州府沅陵縣東北劉陽故城在今長沙府劉陽縣東州陵故城在安陵府沅陽州東南按今武昌府通城縣

西亦有下雋故城隋省入蒲圻然則非漢下雋也蓋周瑜所食邑與下三縣相連吳時移置于巴陵界也通鑑孫權分長沙爲漢昌郡胡三省曰在唐岳州湘陰縣界

瑜還江陵爲行裝而道於巴邱病卒

顧祖禹曰巴邱城今岳州郡治相傳孫吳所築故城也初爲巴陵郡閭尋置巴陵縣吳地記周瑜墳在縣東二里

三國志旁證卷二十八終